



## PORTAVÓS VI GOVERN U KONSTITUSIONÁL



## KOMUNIKADU BA MEDIA

Dili, Loron 16 fulan-dezemburu tinan 2015

### **Parlamentu Europeu aprova Akordu kona-ba Vistu sira ho Timor-Leste**

Durante horiseik-kalan, loron 15 fulan-dezemburu, Parlamentu Europeu, iha Bruxelas, aprova ona akordu kona-ba livre vistu ba estadia (hela) ho durasaun badak entre Uniaun Europeia no Repúblika Demokrátika Timor-Leste nian. Akordu ne'e prevé kona-ba livre vistu ba sidadaun Repúblika Demokrátika Timor-Leste nian no Uniaun Europeia nian sira ne'ebé sei dezloka ba teritóriu entre Membru Estadu sira, to'o loron 90, iha períodu ida ho durasaun loron 180. Implementasaun livre vistu ba malu entre parte rua ne'e, nakloke ba ema husi kategoria hotu-hotu, la haree ba motivu husi ninia viajen, ho exesaun viajen atu hala'o atividade ne'ebé hetan remunerasaun, no vale ba nasaun hotu-hotu iha Uniaun Europeia ho ezesaun ba Reinu Unidu no Repúblika Irlanda, tanba nasaun rua ne'e la'os parte hosi "Espasu Schengen".

Iha loron 26 fulan-maiu tinan ne'e, Vise-Ministru Negósiu Estranjeiru no Kooperasaun, Roberto Sarmento de Oliveira Soares, asina akordu ne'ebé vigora ona to'o agora ho karakter provizóriu, hodi hein aprovasaun hosi Parlamentu.

Justifikasaun husi relatora Uniaun Europeia nian ne'e esplika katak akordu ne'e "Sai hanesan oportunidade ida atu hodi valoriza relasaun ekonómika sira no ba turizmu" no fó sai katak "hetan tiha nia ukun rasik an, Timor-Leste rejista ona estabilidade demokrátika ida ne'ebé lalais tebes no merese hetan eloju". Relasaun parseria nian sira entre Uniaun Europeia no Timor-Leste "hatudu ona nia kualidade" no dehan katak akordu ne'e "sai hanesan pontu aas liu hosi aprofundamentu relasaun entre Uniaun Europeia no Repúblika Demokrátika Timor-Leste".

Portavós Governu Konstitusionál VI, Ministru Estadu, Agio Pereira, afirma katak "Timor-Leste sauda votu ne'ebé maihusi maioria ida ne'ebé boot ne'ebé afavór ba akordu ne'e, iha kalan liubá ne'e, no hein ho esperansa ba vizita husi sidadaun sira husi UE mai ita nia páis, nune'e mós ho facilidade hirak ne'ebé ofereba ba sidadaun timoroan sira hodi tama ba-iha nasaun Uniaun Europeia nian sira. Aprovasaun husi Parlamentu Nasionál Europeu ba akordu ne'e refleto di'ak tebes ita-nia maturidade polítika no diplomátika, progresu ekonómiku no kapasidade husi ita-nia servisu imigrasaun nian sira, no ida ne'e hanesan votu konfiansa nian ida ne'ebé rekoñese ita-nia estabilidade nasional, seguransa no valór demokrátiku sira."

#### **REMATA**



**Agio Pereira**

+670 7723 0011

[agio.pereira@cdm.gov.tl](mailto:agio.pereira@cdm.gov.tl)

[govtlmedia@gmail.com](mailto:govtlmedia@gmail.com)

[www.timor-leste.gov.tl](http://www.timor-leste.gov.tl)



**Agio Pereira**  
+670 7723 0011  
[agio.pereira@cdm.gov.tl](mailto:agio.pereira@cdm.gov.tl)  
[govtlmedia@gmail.com](mailto:govtlmedia@gmail.com)  
[www.timor-leste.gov.tl](http://www.timor-leste.gov.tl)